

# Fasnacht 2019



Das stellt zwai Schugger im sälbschtfahrende Tesla dar  
denn stoppt dä Tesla plötzlich, grad vor dr Pussy Bar  
jetz hett er kai Strom me maint dr Aint und foht a lache  
n e i i i, dä waiss doch efang gnau wo mir unsri Pause mache.

Am Sächsilüte gsehsch d’Frau Ackermee zem Böög ane gwaggle  
als Ehregascht hett’s’ en deerfe aazinde mit dr Faggle  
aber do hänn e baar Zunftbrieder lutt verkindet  
friehner hänn d’Häxe dr Schitterhuffe nid sälber aazindet.

Mi Maa hett mi gfroggt was mer am Sunndig koche wänn  
no hani gsait, ebbis wo mer scho lang nimm gässe hänn  
und wo’n’en eso aalueg, hani miesse lache  
mer könnte jo wieder emol e suure Mogge mache.

Wo YB Maischter worde isch hänn si sich an Basel gwändet  
und em FCB e Entschuldigungs-Schrybe gsändet  
und derzue no e Guetschyn, schwarz uff wyss  
fir e Wuche Trainingslager z’Bärn im Stade de Suisse.

Drey Fraue hett’s aggtuell im Bundesroot insgesamt  
au d’Martullo-Blocher spegguliert jetz uff das Amt  
aber d’Fraue-Quote wurd denn allem aa  
bi däre nit styyge, die gältet jo als Maa.

Bis zletscht fahrt dr Dreyer no bis Millhuuse  
bis zletscht fahrt dr Achter bis zem Hornbach uuse  
bis zletscht fahrt dr 14er bis Lieschtel, s’wär glatt  
denn mien d’Rambasse nimm mit em Traktor in d’Sadt.

Dytschland isch Fuessball-Wältmaischter, dasch dr Bescht  
aber y main nid jetz, dasch scho länger här und Schnee vo gescht  
wenn y dä Värs aber in vier Joor wieder sing  
isch’s denn no vyyyyl länger här, wo die Wältmaischter worde sinn.

Y ha Bekannti, die ässe Käfer, Wirm, Kakerlake und Maade  
no hani die kirzlig zum Ässe bi mir Dehaim yglaade  
dä Spruch wo me immer heert hani drum nit vergässe  
bi mir do kennet ihr abem Bode ässe.

Scho 90 Joor alt isch d’Mikey Maus vom Disney Walti  
au d’Somaruga fyrt, dasch zwor noni sone Alti  
si fyrt d’Änderig vo ihrem Titel, däm Glatte  
in die wyblig Form vo BUNDESRAT in BUNDESRATTE.

Die Hornkueh-Abstimmig macht mer hitt no Mieh  
also ych bi eigentlich fir hornloosi Kieh  
denn y fänd’s jo nit luschtig bim Ässe am Disch  
wenn im Hörnli-Haschee no sone Horn dinne isch.

**Wottsch au by uns bänggle?**

**Uff [www.vsgbasel.ch](http://www.vsgbasel.ch) erfahrsch meh!**

